

四庫全書

集部

欽定四庫全書

石田詩選卷四

明 沈周 撰

宗族

汎月辭 并序

家君以風痺兩年不良行今稍可扶掖出入七月望
夕氣清天高神情朗徹因合近局五七人汎舟奉遊
于谷木川上水月浩然照人如畫乃烹鮮醺酒捧

觴屢進復造此辭揚聲中流歌以佐之客亦宛轉齊

口相和家君馴及微酣月午始返棹可謂樂矣其辭曰

川之迴兮澹無風月初出兮露橫空汎樓船兮川上弄
明月兮川中鼓蘭槳兮揚彼素波光出沒兮復見星河
清歌激兮觴屢進夜未央兮歡樂多歡樂多兮百憂釋
百憂釋兮除疾除疾兮安吾親忘歲年兮遊無極

七月望奉老母汎舟玩月

沙溆生涼壁月秋老親看月子操舟雖無王守觀燈樂

也類潘郎禊祀遊風動高荷聞露注星明疎竹亂螢流
酒波汎汎清光裡但願年年照白頭

中秋感懷

去歲中秋月吾親正在堂今年親不見此月若無光淚
眼渾迷霧衰毛半染霜東家共清夜依舊有華觴

除夕歌示子姪

去之歲來之年一迎一送燈火邊迎新送舊大家事覺
與老者偏無緣黃雞未號霜滿天一心百感惟惻然小

兒自喜時節至催理靴服誇新鮮固知老者已異趣青春似因兒女妍青春懸老不多地白髮紅顏俱眼前去之歲來之年譬如傳馬相絡繹又如車輪相回旋誰從箇裡饒不死嚙氣苦苦脩神仙我於所去已五十其來百歲亦倘焉使我五十不為天使我百歲不為延尚有去者與來者在我先後計萬不計千其間豪傑夢幻耳冥冥漠漠真堪憐惟有青竹數行墨待來追去各可傳勸兒必讀牀頭編莫惜買讀吾無錢男兒所立須

及早老夫代爾耕春田

古木羣鳥示鴻兒

羣鳥小筆聊耳爾宣足貽謀為兒子汝今裝襲亦自好
況多題辭大夫士我家孝悌仍力田自此相傳逾百年
門前大樹已合抱今有此鳥巢其顛人云鳥來不易得
他家豈無樹千尺北平乃見猫相乳江洲亦聞犬同食
我慚何有於鳥乎我自我兮鳥自鳥汝當力行為已事
毋但區區重畫圖

送異女歸徐氏

紅車綠幘及春明六禮周時汝好行銅鏡試粧花髻拙
布衣隨嫁竹箱輕繁絲緩柱房中樂細鱸深杯堂上羹
婦道從今須孝順戀家不必淚盈盈

憶弟妹

五人弟妹一胞親白髮于今剩兩人半夜鴈聲孤枕月
起來愁坐不訾身

拾遺紙感繼南手墨

亂莖初拾得舊墨忍重披繼燭垂垂際蒙塵漠漠時楚
王遺屐念原婦故簪悲掩卷山窻下潸然老淚滋

德韞弟禁酒有作兼咎鴻兒

此病都因痛飲中自憑斷飲作醫功便須真止從陶令
也莫無多學次公醒坐煖宜東閣火酣眠煞忌北窻風
重君猛省吾深喜安得聰明及阿鴻

喜標弟開館

家庭人靜日遲遲檢束青衿漸有規小子方能識癡叔

抗顏真去作人師牀頭把卷書魚走窓下開絃野鶴窺
訓詔有餘仍自學知君況是少年時

喜爺奎二姪延師教子

俗習務淺鄙養子多昧教且云粗識姓便是學之要學
豈止識字要在知人道人道重綱常文藝稍加膏愛子
若不教護病不醫療往往歲月後歷歷見狠傲孝悌莽
無知禮義蔑循蹈辱父辱門第至此徒悔懊此過不在
子在父長其暴能教始為愛教成自有效不可吝鞭撻

不可恕幼少今年賀美事二姪改俗調令子從師儒詩
書發蒙冒此舉足高尚先緒喜可紹譬穀既歷春白粲
脫黃韃又譬金溷沙披汰金乃耀願言勿中畫進進有
遠到

徐甥子修童贅

吳人多男效秦贅贅男與人如接樹抱他根本作春色
為榮為枯信天賦小兒拜我下堂行雙屣垂疏繡襦袴
愀愀何省傍人門離家苦動爺娘慮老夫為渠且莞爾

兒債眼前寬一步

失孫

茫茫得失真誰使欲問惟應造物知
六日流光人屬夢千金遺愛淚如絲
重來尚結他生願老去難禁見在悲
嗣續百年成底事藁苴空剩此篇詩

抱孫

榦且豐隆骨更奇白頭喜抱此孫兒
十分事足惟些欠不及婆婆眼見時

人日訪徐氏妹

曠時思覲面引棹不多程未似鍾離遠便從人日行提攜惟一榼迎拜有諸甥白髮團團話春風繾綣情

正月四日喜許氏女得甥

汝寡無丁男托命惟一女活世真廢人盲瘖無乃是今年女有育正月利弧矢乃是四日生六日方聞喜得報訝其遲隔縣本非邇老夫笑滿面賀汝似得子他人視則甥在汝則子比緣情遂七分慰眼併遺氏在我固稱

彌因汝喜切已婦人曷持家
嫠釵有恃身後饗梁盛
其氣尚有以汝夫在地下不為教氏鬼譬如委霜草今
為春風起復如涸溝魚一夜漫春水只憂不曾生既生
長易矣便須買書本教小孩提始成人無他圖讀書而
已耳

悼內

結襦四十二星霜貧賤來歸貧賤亡祇剩辛勤在麻枲
儘知慚愧累糟糠駸駸馬齒偕誰老耿耿鰥睛覺夜長

淺土不安緣借殯青山愁絕幾時藏

正月十五日送三女歸史氏

春王正月及佳期送汝登車甫結褵累重忽輕心自喜
愛深將別意還悲逞粧莫漫求珠翠善事須親到帚箕
孝順由來宜婦道尊嫜况我舊相知

哭母

都房笑語處腸斷忽然空昨日今朝事天翻地覆中痛
將雙眼血願染九泉紅我母知相憶時時魂夢通

哭親

不見堂上親遺我堂下身有身如枯桑不復知青春人
皆依父母我是無依人感恩等天地徒然抱涓塵報養
已不追此身何用存欲死顧有托欲活無精神杲杲白
日下冥冥與死鄰痛撫心肝腸崩裂不可紉

示復兒

言語不可苟謹之應免尤使聽人不厭容察實無浮當
識寡為吉勿令輕起羞此聲心所發心要與聲酬

十二月一日亡兒附主于祠

悲傷未輟淚又及免喪期碌碌有窮日冥冥無盡時破
家瘠老力瘦骨裏空皮以汝附祖食幽魂安可知

雜流

雅士吟

雅士居鄉黨平易以為德口惟無妄語貌有和樂色溫
恭一座上四隅皆敬飭他日偶虛位囂囂衆狂忒如冠
在人首寒煖初何益便去若無妨但覺儀觀失君子無

異人無之無以式

貧女吟

貧女勿多怨怨多亂心思慕富不知分厭貧不知時折
荆聊約髮金釵同一施練布與錦段適煖同一宜貧者
豈長貧時至會有期在時不在貧嫁德不嫁姿請看白
頭女終為王者妃

溪翁

參差榆柳逼門前不剪茅茨不斷椽歲晏鷄豚隣社鼓

秋深蝦蟹水鄉船會羞蓴菜量加糝
嗔拘荷花誤結蓮
昨日逢渠溪漲後別無言語只憂田

牧童謠

朝牧牛暮牧牛朝朝暮暮牛放收
騎牛喫草抱牛睡牛若渡水我亦
汨牛東信東西信西我弗強牛牛
自由不勞不饑肥且長背肉秋來
平似掌逢春耕田牛得力大凡要用
先須養家中大哥氣力無一春築城
夏鑿渠交秋又點征匈奴我為大哥
鼓龍胡

從軍詞

闕

屋資無告故人散草中五畝愁荒烟面盧骨立牙齒脫

短褐曼胡管屨穿逢人欲歌豪或在聲吞苦淚秋漣漣
老人勿悲此世態富貴貧賤本相縣薄徒勉強狃勢物
聚散茫茫雲霎然但願老人有錢復年少此輩明朝還
拍肩

贈老人

淚滿雙頤雪滿顛一身憔悴自應憐座中誰似楊開府
莫易逢人話少年

屈老

長帽西風滿面塵相逢憐老不憐貧三盃濁酒浮生事
一曲悲歌萬感人螻蟻未知何處骨蜉蝣聊寄不訾身
白頭對客無聊賴還說鶯花少日春

地理師

洛卜鑒瀍澗虛望知以楚地術有由來世好則往古之
子悉心久自視曾揚侶登臨啓顧瞻富貴隨許與山水
若呈秀目力無違迕苟有禍福存願言無妄取

白雲山樵歌

白雲山在何處太和峯下紫翠堆邊是山中道人玉作
斧慣向雲根斫琪樹束之三萬束凡火不能燼却使火
龍水虎相煅煉黃婆鼎中七七始成齊小服百年飽大
服飽千歲長生之藥元酒味永不饑兮永不醉神仙洞
裏觀棋去斧柯爛盡不歸來人間甲子須臾事

贈接花叟

打得旁枝手有神接他生氣一番新自家無限真消息
錯借春風與別人

遇李生

李生生北方膂力矜異，鬪桑弓勁如鐵，輕引左右臂短，衣獵南山猛虎，俱待斃官衢多騎，劫一發嘗貫二含笑，擔其囊輒補酒家費，小飲三百盃，味薄不足睡，夜半挾金餅隔樓調鄰妓，橫行長安中，五陵誇結義，秋暑滿谿閣，解衣詫能事，搥牀助談屑，秉燭聽未既，衆客不敢譁，懾此河朔氣，座無揚開府，娓娓當誰為。

贈隱叟

比比人稱馬少遊此生鄉里信沈浮東平格語善最樂
關老家風貧不憂白戰雪中詩敵手黑甜夢外酒扶頭
子孫富貴曾無望只囑吾書仔細收

贈史癡翁

我昔聞癡翁已及三十年不知翁為人名癡胡其然癡
本性不慧朦朧百不便今年闔閭城握手在市廛角巾
摺軟羅腰帶敝帛纏短屨草獵獵長袖雲翩翩溫慰未
通語輒歌沈醉篇拉翁黃公鑪買酒醉聖賢却盃不事

飲莫與癡為緣我謂癡所發必恃酒為權無酒癡不成
癡酒不可偏云癡豈假酒假酒癡不全我癡抱混沌七
竅莫我穿若謂酒使我良馬亦俟鞭人以黠教我我自
信癡蟬人以嗤我畫我畫師癡虔手採夾袋中出具置
我前水墨乃從事慘澹開雲烟大幅及小幅紙影彌山
川圖成贅言句草次亦及玄市上諸小兒驚駭謂之僊
清虛結簪袖鶯花亦留連要去不掉頭急急箭脫弦無
慕豪富門脚版如鐵堅此翁所以癡以故囊無錢於人

有雌黃常在口角邊於人有孝義記注一大編此翁不
癡者人焉得知焉吳人多癡呆翁豈吳人傳翁云我吳
產此病知莫痊我生迨八旬落魄如風顛不知人所毀
亦不求人憐種竹欲借地買書常賣田蓬蓬被白髮吐
吐書青天我顛與翁癡癡顛相比肩約為老兄弟逍遙
覓彭錢

僧道

老僧

精舍沿街似離城一爐柏子送經聲閒因累少身俱嬾
老覺心空死亦輕蕉葉大宜秋雨淨竹梢底愛晚雲橫
尋常見客先稱病只坐匡牀無送迎

丹僧

深目流光口帶髭梵書真訣鎮相隨茅山道士燒丹伴
天竺先生授記師毛製氎袍寒日著顚裝金碗食時持
遊蹤又逐閒雲去滄海重來未有期

贈源上人

必藹聞香十年已嘗有寄緘烏有裏紙從人家誦卷軸
千里何殊相晤語雲萍蹤跡不可呼眼外之人疑老矣
今年秋暑我牀榻脾病困頓未能理黃昏短刺墮枕前
不倩人扶攬衣起吹燈相照見瘦玉人與清詩正堪儼
僧中此老古或有超然已覺今維此翻經石上月紛紛
半是微哦細吟耳我持此癖七十年滿地江湖俟知己
傳杯夜屋破蚊蚋且畧無生談賦比杭州官府尚多賢
當面參寥惜無與脚膝之下自有地不作窻蜂苦鑽紙

斯文有契屬老境頻往頻來自伊始白頭接膝無百年
人生歲月如流水

答僧求畫

參方歸去草鞋穿老屋清齋省舊緣千里絕雲行脚債
一單安月在家禪蕉留庭戶因供字筍熟園林不賣錢
何苦要儂粗水墨此心猶落妄塵邊

和鉞古田韻

昨晚溪頭月色纖老僧相見且和南筭春已及一百五

問老今慙七十三桑戶日長蠶足食竹堂風煖燕交談
茶麤酒濁無清供奇石銅盤也自堪

和僕公韻

詩僧隨分住市構且三間比屋地俱俗隔簾人自閒道
同潭性徹法化石頭頑吟思充行脚時時出世寰

和嘉本初夜泊楓橋韻

風流張繼憶當年一夜留題百世傳橋帶人家斜倚寺
月籠沙水淡生烟火知漁子仍村外舟載詩僧又客邊

我愧不能同此宿却因新韻偶聯篇

趙頭陀

山住忘入年衆慮攝一定氣味漸木石久久同心性面
瘠疑饑成肌澤匪浣淨覆髮短及耳鬚搓黑紛勁邇來
訪人寰迹若無塵境半跏就長衝目瞪神亦凝過旅詰
何脩百語罔有應中露詫莫偃尚見雪霜更動偶不知
動靜至不覺靜譬觀鏡中影出入何害鏡施食信酒肉
大啜蔑羨剽投貨畧不顧千金等破甌謂仙人莫究云

佛誰敢證塊然天地間造化莫命令

題芭蕉贈僧

山僧心與跡俱閒未限居山及出山長對芭蕉閒不過
時留一偈葉中間

方水雲過竹居

翩然學仙子浮遊大江東落落三年間始喜一再逢皎
皎衣白葛我戴芙蓉造我脩竹下自開牀頭壺叶笑
歌杯酌次揚聲動冷風勸我事至道玄默與天通欲學

知不易衰顏無故紅明朝返笙鶴無方追往踪

方道士還冶城

僧順嘗有言惠不在天上但行即須到此氣何勇壯水
雲黃冠流詩酒發清曠十年落東海故國隔西望亦云
自不歸要去誰我障配順足有餘天地納豪放今日金
昌亭風緊秋葉蕩留亦無不從去亦無所悵吸我白玉
鍾仰面月相向酣歌一掉首雲鸞渺仙仗

全真道人

碧色襴衫雪色鬚山林城市迹何拘
標清自認身如鶴
步捷人疑舄是鳬掛搭烟霞詩夾袋
浮遊雲水藥葫蘆
長生脣舌誇能事不敢輕傳恐涉誣

還俗尼

婆夷本欠佛因緣無柰心香起業煙
衆散珠林還火宅
官收寶地作民塵菩提舊念慈雲滅
歡喜佳期好月圓
清淨池中生愛水從今都長並頭蓮

寶林裝師八十

定裏何曾記歲華萬緣空是壽生涯千峯健步無筇竹
一鉢加餐有飯麻心似青蓮藏般若眼將秋月照楞伽
問師歷臘今多少不欲通人道喫茶

黃道士醉死

汝師緣醉死汝死亦師如墳借糟丘築碑將酒德書足
跳跌後跛面漲痘時虛化去不留影吾詩真寫渠

西山老僧

老抱清齋太瘦生雪眉霜鬢使人驚遊僧久住同衣食

畜鶴長隨識性情
土堙逼牀身煖活
紙窻烘日眼晶明
此心應與山俱靜
不是深山養不成

寄金白菴

白草茨菴白葛衣
白頭嬾剝雪根稀
子孫登錄俱天上
獨掃青山待客歸

一箇蒲團一老身
蓮心清淨不知塵
更將蓮舌話生滅
點斷冥冥過世人

題僧化緣疏

忙忙展枕逐鷄棲洗面忙忙鷄又啼傀儡不知提處假
髑髏方信活時迷身如革鞠無多氣墳認饅頭却是泥
儘積萬金難買命依然一箇死閻黎

雨中訪白菴金公

雨戶無人應客過自遮明眼把楞伽歲年漫度不知臘
天地無方何問家鴨脚樹高生茗果虎鬚蒲乂發仙花
一番相見一難得莫怪趙州頻喚茶

尋僧不過

幽蹊漫石水縱橫遠見孤雲與塔平
特抱琴來僧已出
欲因山峙鶴先行
交鳴野鳥嘲風暖
亂發林花趁雨晴
墻壁淋漓題墨遍
詩成懶得更留名

燒丹道人

真不能全道強名東鉛西汞詫煎烹
癡人夢被黃金惑
浮世忙因白日生
敝屨市廛雙草健
破冠塵土一瓜橫
欺心玩弄神仙術
欺到死時心始平

石田詩選卷四

欽定四庫全書

石田詩選卷五

明 沈周 撰

古跡

泊百花洲效岑參

長濠春來水如油
吳王昔日百花洲
水流花謝三千秋
古人行樂今人愁
沈沈細雨停孤舟
岸上人家燈滿樓
紅簾火影照中流
還聞吹簫樓上頭
客夢不熟翻黃紬

翻黃紬夜悠悠拂吳鉤賦遠遊

和張光弼歌風臺韻

大風起兮雲飛揚游子歸來尋故鄉鄉中父老認天子
會酒擊筑歌慨慷載歌載舞未為央留之十日未為長
暢然草木尚有感滿眼故舊情何當丈夫志已酬咸陽
壯心何用泣數行四海一家何論沛猛德何法守四方
千秋萬歲邈在後魂兮不歸天地荒高臺已夷烟草黃
樵童牧豎談漢王

滄浪亭故址為僧所居

一池風月十亭多費價其如四萬何今日滄浪休問主
百年興廢本同波煎茶又勺吳僧鉢濯足空傳孺子歌
只在城南自清徹車塵馬足有誰過

鄭公釣臺

徽之歛縣富登渡有巨石巍然臨湖鄭師山
子美釣遊於此余患宣廷心篆鄭公釣臺四
字刻于石石上仍作亭扁仰止以重二公之

高風峻節因賦

忠宣義死堂堂節死到師山義亦明家國兩人均患難
干戈滿地正縱橫聊因心畫通相感未必漁竿果可旌
何處江湖無此碣幾人標榜有高名龍跳舊刻還堪搨
燕賀新亭又喜成岳勢不迷人仰德石痕固在字含貞
蕭蕭風雨鬼神泣洶洶波濤魚鱉驚一個聘君孤搆耳
乾坤今許作雙清

清風嶺

干戈國之禍使妾骨肉殘翁姑與夫男狼虎併一餐妾
恨不同死有身何用完有身色所累有色辱之端固知
一死萬事畢死雖容易就死難長軍癡兒徒好色不知
妾命死自擽言挑兵脇不足動俘婦雜守嚴如狂清風
嶺白日寒陟崖深江妾命所安齧指出血寫石壁字字
入石深若刊五十六字碼碯癥丹丘怨血淚汎瀾千古
萬古願不漫詩成一投死萬仞凡筭無計留青鸞區區
眇婦人烈烈男子肝網常一婦強千男偷生忍死皆達

官偷生忍死皆達官血詩仰面不敢看

登妙高臺

登臺見青草默默感今昔江山本舊觀形勝我新識江山不因臺流峙天自闢臺固為江山亦當為遊客往來相無窮有得與不得坡老莫可呼舉酒酌江色

登姑蘇臺

把酒弔往迹茫茫幾鹿遊興亡兩國夢感慨一臺秋戰葉風仍亂爭流江未休傾城美人事殘堞暮雲愁

韓克瞻宿五國城因賦

金根濡滯是何年寂寞荒城尚宛然來者無窮還逐鹿
歸心不死定為鵲黃沙夜冷霜連草青海天低月墮烟
孤客此時思往事一和錯盡自澶淵

讀荆公爭墩詩

荒墩落日草蕭蕭公我相爭已異朝黃土不知今古姓
亦無百姓種青苗

經趙松雪鷗波亭故址

茫茫遺業海桑邊感慨因歌溪上篇公子不歸鷗自白
庶人來住鳥仍玄蘿蕪細雨山連郭翡翠斜陽水滿川
珍重圖書獨無恙淡烟疎蒨自千年

經舊遊

最無根柢是豪華陌暖風晴又別家種種傷心秋雨裏
芙蓉只好看花

經陳永之

分明經委巷不是昔來時賢者留相憶空家住又誰草

蛩悲語在樹鵲故巢移仁義一如此令人心未夷

宿南潯詢丘大祐張子靜故居尚遠因作

不見二豪誰與遊髯張入地伴長丘湖山洵美人何許
生死難忘夢在舟詩塚莫尋青草宿釣磯依舊白蘋秋
清苕百里將雙淚老眼西風獨橫流

重修醉翁亭

丘亭兀兀倚殘碑風雨漫漫刻已夷天地無窮翁尚醉
文章不朽石如斯滁山終古當增價太守而今復謂誰

振靡扶衰論作者未應韓子獨稱師

登鳳凰臺

江上秋風吹鬢絲古臺又落我遊時
六朝往事青山見四海閒人白鳥知
詩卷也充行李貨布袍不直酒家資
彈無長鈇懷無刺浩蕩高歌歸去兮

懷古

讀漁父辭飲酒詩有感

展書聊就紙窓明楚晉亡機出一衡
大厦蘄顏何力起

厲階層沓幾時平
靈均耿耿獨醒死
陶令沈沈爛醉生
千載文章共肝膽
令人長嘆莫收聲

讀吳越春秋

春日寥寥雨又風
小窗開卷兀衰翁
斯文斧鉞興亡後
故國醞雞語話中
臺越還聞走麋鹿
墟吳真見有梧桐
更憐胥種皆從劍
敵破謀亡一禍同

鴻門宴

莊劒擊伯劒翼一家
兩人自相賊
天當與賢勝
人力劒

生豈是屠龍客忙忙勞人三舉玦座上謀臣面無色謀
臣計失失敵國敵縣虎口虎不食盃酒之間天解厄此
機老增亦何識徒為豎兒滋歎息豎兒豎兒策不長富
貴先思歸故鄉凶暴為德凶暴亡至死不知仁義王

灌夫使酒

任俠復尚氣平生無俛顏貴戚相引重聲名概世間醉
酒屢罵座陷胸若無難挺身執父仇疋馬突圍還豪猾
傾潁中納貨相結歡終然使狂藥禍發致生殘不戒惡

旨說無術良可歎

韓安世墮車蹇足

弘畧濟忠厚智亦當世務片辭釋國嫌至誼藹如故相
階屬甫陟奉引蹶而步何足以蹇人造物偶其數

鍾離意不拜賜張恢贓珠

清川弗納濁方枘不納圓簡珠雖云寶穢得名莫全臨
恩所不拜戒飲懲盜泉志士無苟取炳然昭性天

感張宏範逼文丞相招張世傑降

螢燭安知日月光
叛降可教正人當
萬生萬死不忘宋
一賊一仁何諱張
大事未亡膏血在
老夫堪哭淚洩長
敵人那識文丞相
鐵鑄南冠金玉相

元祐黨人碑

熙豐小人用壞政
始介甫類從一何
衆三朝養禍抵元
祐用君子四海賀
馬呂豁然破積晦
有若日當午一日
十二時午位僅一
數十非其位乃在
小人所天意未厭
禍善類終遭侮在
睽同而異川朔失
為迕其輩隨以

動在咸象于股奸京柄崇寧首以故案舉深虞道復長
籍黨表天下一鐫亦莫服鑿石竟何補邪正均一罰株
連示清蠱今於歲月後是非目誰瞽譬瞻星與宿經緯
森天紀不妨紊彗孛各自粲堪指君子猶元氣不能絕
其緒但含消長機小人昧其旨雖云詐力大欲絕亦繆
矣十步有芳草十室有賢士若使朝廷無曷以維國是
不以溷小人同事信難處其勢莫兩立傷夷至於此小
人務闢釁君子務必沮柰何君子少莫勝小人侈恃勝

初無人習惡後無主丁秦及賈韓馴至國遭擄一旦中原失小人實為佑乃鑑殷之亡先聞九侯脯碑者本悲也我來手重撫

馮道二首

能臣五姓亦多忙旦暮朝廷傀儡場儘有癡頑塞羞恥了無恩怨涉興亡送迎數數真郵督侍從番番老楮郎莫怪不能知大義兔園冊上祇農桑

相公惟舊帝惟新歷享台垣富貴春竟莫識為何老子

終當書作某朝臣
厓房戀戀輸蜂義
梁壘依依愧燕仁
功業不知何所有一
編青竹漫遺塵

讀漢高紀

書燒禮樂隨之熄
長者還生傲慢風
四海未嫌驕仲氏
一羹還欲共而翁
獨輸留皓鴻
增外莫怪韓彭狗
鼎中天統特推三尺
定敢於贏項說英雄

莫砮銅雀硯歌

有序

草憲劉先生嘗賦銅雀硯歌有云
呼兔開匣

取長劒碎碎慎勿留其蹤讀之知先生疾操
之心發之於言若是之烈也周懦夫不能不
失聲於破缶故作詩解其怒而願有所存也
拔劒碎瓦瓦碎何用碎碎於瞞莫為輕重不如掣取太
史筆青竹中間削其統老瞞自欲瞞春秋公議所在人
焉廋瓦痕雖留漢正朔心實無漢虛尊周願存此瓦長
作硯猶因子墨點瞞面漢賊明將漢法誅千載煙華漬
深譴古云不以人廢言言如可存瓦可存識賊鑒亂於

人羣瓦無可惡惡在人嗚呼莫將人瓦併案罪我為題
詩救其碎

題中興頌石刻後

有冊有冊一尺畸啓閣重是磨崖碑平原太守氣骨壯
殺賊餘力存毛錐千年白石耀深刻風雨不剝神扶持
銅柱莫拔魑魅走鐵網欲破珊瑚搯快觀書法十數過
馴讀其語增噫嘻君王愛色不愛國金錢買禍由洗兒
長安洛陽要自臨法宮蜀棧誰安危嗣君雖然返舊物

以得補失終磷緇此碑頌德實揭過有家有國留箴規
晴窗日揭不輟手來禽青李生蛛絲

淵明采菊

典午江山醉不支先生歸去自嫌遲寄奴蔓草無容地
慳剝黃花一雨籬

子陵垂釣

一出聊全故舊私急歸自信海鷗姿中間亦有君臣誼
買菜侯生豈得知

和陳惟寅先生姑蘇錢塘懷古韻

開國樂湖山流觀起高臺因有獻楮人木杙自茲來侈
泰遂亡國捲地驚風埃

孫勝有奇占揚風骨亦無他日秦餘杭三匝不可呼令
人追往夢鳥雀悲煙蕪

伯業不可久闔閭行復墓世換悲樹葉人滅驚草露吳
越互興亡無足笑百步

右姑蘇

襄鄧固宜國李相言莫行偷安昧遠圖彈丸荆棘生北

來勢受敵大江顧南橫

海氣薄宮闕燕幙傷故都正如當道蛇延頸待人屠一枝難苟安展轉南飛烏

和計適召敵風塵入松關六龍一逋播王氣去不還惟

餘岳墳樹枝葉無人攀

右錢塘

讀出師表

兩篇忠告慨慷辭字字中間有涕洟天下二歸心屬舌隆中三顧道存伊老臣虛已六未解瞞子輸才十倍之

謹論堂堂誠激烈孤忠瘡瘡力驅馳轉征南北思何遠
愴及桓靈語更危開濟莫酬徒有策英雄先死却無時
天荒大野星俄隕水嚙空江石不移不朽文章千載事
後人能鑒乃能悲

子陵獨釣圖二首

霜落江清木葉空丹青有像是非中羊皮不恥見天子
鳳德何曾屬畫工千古超然此翁迹一衾聊耳故人風
能來能去形骸外私莫容窺道自公

一宵展足便江湖能去能容兩不孤天子教人知友道
先生立節為貪夫釣絲裊裊其風在物色寥寥此貌無
附義懷仁言已盡菜乎使者亦何愚

陶朱公知子

見苦惜家難贖死阿翁先見已如神曾家老母尤能事
自信參兒不殺人

和桑通判弔文文山六歌失火

兩宮萬里塞雲黃三閩四廣天子忙孤忠老臣老不死

膏血幾時湔國恥天高欲訴衍六歌手把怨筆濡天河
天河不乾怨長在朝廷凌遲家破碎老臣已死稿苴存
金玉輝生舊墨痕鬱攸小兒那解事紙影雖空有文字
傳人流世自千年擊劒重歌雙淚前

時事

丁未九月聞哀詔

樂青安生今二紀號弓莫盡白頭悲帝鄉雲氣神仙遠
地道春恩草木知裳繡不曾通藻迹野飡空自切芹私

江山無改千秋物明命惟新又一時

聞邸報

白髮窮簷憂老農邊塵日日有驚烽諸公謀事誰房相
今上籌邊似太宗萬里長城須法守一丸函谷豈泥封
勞來逸待無餘說堅壁何妨數十重

聞三原王公致政

功烈堂堂六十年勞勞萑菲不妨賢至公何待歲與月
未定且由人勝天雲鳥青山形迹外風塵白壁笑談邊

江湖雖遠憂仍近長對南薰憶五弦

聞劉兵侍稱疾竟歸

即枕初章便買船要歸竟自有歸緣誰知原憲曾無病
我信張良豈在仙長往莫維駒皎皎冥飛不下鳳翩翩
先生此去江湖大真與鱸魚長價錢

讀揚宮詹與屠太宰論事劄子

闕

氣則直讀之聲泚泚韓論及歐書異代而合蹤既可扶
國是抑竭朋友忠百年無此言友道從而隆朝廷罰臺
給株連班直空宰公乞攝曠奏上何匆匆畧弗涉救援
於是涉迎逢急彼故緩此意外有牢籠人情鄙茲疏詆
訕紛詢詢臺為風紀御給本絲綸總朝廷托耳目立法
由祖宗官小係則大責重望乃崇懲忒以之律邪佞以
之攻從則如水流不從如水壅士氣要在養養則其氣
充折沮失審諤使之抱暗聾天王本聖明宰公實股肱

信之如著龜可以定吉凶慷慨能行義豈曰無優容難
解者彭王喜怒注宸衷程罪終見釋鉞幸終弗庸公議
皎如日晡及三尺童豈宰顧不諒而弗及童蒙朝廷行
是罰名以懲不供因攝以寓援何不鑑觸龍乞漿或得
酒求魚庶離鴻言患不至此何患聽弗聰所惜在諫垣
兩挫一歲中歲來其媿媿履霜愴凌凍不可視朝廷長
有拒諫風鳳鳥吝不鳴若鳴致時雍匪為羣諫地自樹
弼亮功其日舉傳奉逮諫適相同奏名四十員珂馬耀

長衝胥靡共趨走俛默不敢顓觀者謂不祥道議起如
蜂其責將誰歸未可謝匪躬當憫時不平亦可悲人窮
不鳴豈瓦鷄不應豈木鐘豈待七年發救焚必征佞但
恐緩不及激切有緘封令人思三原當此熱心胸陳乞
惟恐後剗切期必從皎皎歌白駒一往無留蹤江湖渺
吾憂其言不可終

附次韻詩

屠浦

予於弘治丙辰間承乏天曹夏四月十有三日科

道官奉旨俱下錦衣衛獄予聞之召四司詢科道
得罪之由皆曰不知且言諸衙門所進民情封事
既得旨例捧到科交收今既下獄無人收領各官
既不得領出於外又不可留宿於內聞先朝亦嘗
有科道官下獄時請命中書等官攝其事予未暇
答銓司具其事呈堂時日已至申乃急為轉達遂
得俞旨是夕臺部封事方得人收納次日予鄉姻
宮詹楊公

名守陞別號碧川今陞
南京吏部尚書致仕

致書於予大意

言科道官下獄閣下即當抗疏請貸如何差官代其事予以不知科道官得罪之由難便請貸及臺部封事無人領收事不可緩之故答之次日蚤予

鄉友掌科呂公

名獻今任順天府尹

下顧問予曰楊公昨有

書與閣下否予曰有因誦彼此書中大意呂公曰

楊公亦以此書送六科科中人皆疑之予笑而不答後與楊公往還如舊者經十餘稔未嘗言及此事至今年秋予朝退還邸第忽有客以先生石田

詩集與犬子徑者予偶抽一冊目之遂見五言古
風一首題曰讀楊宮詹與屠太宰論事劄驚曰異
哉讀畢不覺大笑因次韻一章名曰解嘲云

宦遊久京國學通尤未通見惡必遠避見善常加恭
石田乃隱者賦詩亦多工如何論朝政所論殊不公
此劄實差謬何謂聲風風到處任播揚有類衡與縱
碧川居論思如何不納忠致書戒老夫友道皆云隆
追思昔年事大明麗長空堯舜喜復出萬幾任匆匆

納諫真如流明良喜相逢荆榛委籬落芝朮收藥籠
萬姓樂熙皞四方無鞠詢今上初出閣庶事元老總
九卿集東閣講官索儒宗先求語言正更論德學崇
人各薦一二不稱交相攻老夫薦兩揚

一即碧川一乃今元老石

齋先生

碧川川流壅為語帶鄉音不及問學充因之又

復薦元老耳若聾欣然用石齋萬口稱股肱碧川已
備知豈肯心懷凶同鄉又相親度量廓有容維時科
道官有事忤宸衷一朝下縲紲難便責保庸

天官入統五日

保庸安
有功也

顛末尚未知焉敢干重瞳臺部上民事俞旨

俱已蒙日暮無人收厥職誰與供越例送臺部又恐
觸袞龍天曹借中書攝事猶賓鴻此舉實舊規碧川
豈不聰書來既善道如何報科中彼若擊巨石我猶
履薄凍今復寄吳下大傷君子風碧川豈為此姻舊
情雍雍意必有憮邪假此成已功抑恐入銓者邪正
有不同或嫌不超擢或怨非要衝當時呂都諫氣節
儕何顓亦嘗論此輩懷毒猶莽蜂其禍必在後亦或

先其躬福善與禍淫循環兩無窮莫道此言虛應若
豐山鐘雲衢漫委蛇何必好征徂馬周三十貴屢受
漢室封崇卑各分定何必縈心胷石田若聞此其言
未必從我欲到虎丘攜酒追吟蹤願言保遐壽待我
談始終

右此和篇蓋都憲屠老先生之所示喻者冲和沛
博之文裕達含宏之度弗愠不知弗遷所怒藹然
使人知長者之德如此也周林野迂腐老昧時宜

初目楊宮詹之劄子將謂其篤于友誼相資成善
能警薄返滴於今之世又謬恃三百篇之旨有懲
有勸形于里巷而無責于是莽無顧忌循其辭而
貫穿以韻然其間鑿枘齟齬而有得彼失此之譏
愚何容度嗟夫侮嫂氏之毀搗婦翁之誣古猶不
免都憲固自諒之矣但周於潞公之所分謗梁公
之所為容焉者不能無愧耳敬跋簡後庸識其迹
之始末云

觀補官

冠冕耀通衢羅綺照芳春珂馬等列侯洋洋意氣新觀者歎且信黃金能貴人黃金本假借觀人自失真窮閭處約子讀書苦長勤書聲振悲風莫次甌中塵敝褐三十年一紱難賁身問子何事此好義已忘貧

揀瓜詞時提學公黜諸生貌寢者

累累黃臺瓜種者欲求售碌碌買食人擇美棄其陋大小各隨形偏正亦隨生滋味在其中包藏那得明君不

見賢妃白頭女又不見賢相跛足子嗚呼貌取豈盡爪
外陋安知中自美願華一臠請君嘗滋味分明為君死
喜李貞菴致仕

九鼎忙忙作人餌頭白眼花朝鼓裏先生有才足補袞
有俸未足充妻子未衰告歸急於矢不謀朋友斷諸已
先生自是不羈人健鶻凌雲秋萬里君子難進退則易
禮義堂堂盡終始太湖可釣亦君魚陽羨堪畊亦君米
出兮處兮樂天私更有文章賁山水

聞余司馬子俊罷撫邊

干戈堆裏許抽身回首功名剝角巾
北敵西羌無外顧青天白日有閒人
尋猿棧道家鄉蜀走馬邊牆夢寐秦

公築邊牆於榆林為功最著者歸興在詩詩在酒
杜鵑啼破萬花春

洪城奇遇

林秋官待用張府歷兼素俱因言事被謫既
而賜環先後同集張內翰元禎宅因而有作
先後萍蓬迹洪城此夜盃星因賢者聚朋自遠方來返

駕白駒谷集靈丹鳳臺文章留健羨千載識奇材

盜發

小竊雖饑寒巨猾實扇起十百相黨羣刀斧弄凶技前
鄰遭砮闢逼貨炙妻子後鄰發重隄進舟當門艤擔負
亦公然罄室乃云止稍或有抵牾人戮廬亦燬無何關
西村旋復嘯東里通川及要路宵征絕行李檢刮空腰
纏體至衣裘褫天寒氷載路溝壑何不委家家夜結束
老少泣以俟一息苟冀安天明各相喜正念一井閑搔

動乃如此江東連江湖固是盜所倚禁弛氣則張類滋
勢難弭有官示以仁得錄不之罪恕實長之道無乃延
小美有聲自此輩識者謂辱已況彼有後言時哉好生
理教虎不啞人所性安可使使譽出賢者天下知善士
民以靜為樂貿貿安生死雖然廢賙恤糠覈自甘旨去
蠹木欣榮除蟻禾茂蕝苟以刑不仁誅勿亦非是刑以
齊亂民用之不得已如何輸租人米駁斃于筆

海警行

海東衡沙浮半洋夾巨頗與崇明長魚鹽蘆葦貨攸聚
利啓爭奪循為常中有兼并兩豪族施恃其勇董恃強
強之無厭勇乃襲燔廬刮產威靡亢強銜所衄思報償
舞波接戰成劉戕縣官移寇悚上吏林侯未然籌且量
首先號召命不方老豪來歸訴讐敵不敢犯法畏有章
區區螻蟻尚顧命拒死不免蹠螳螂雖云餘類擁其子
跼蹐祗為讎家防傳訛乃煩兩重憲地隘豈足鵬軒昂
魏公善鎮殊不忙陳公善料殊不揚臺按臬監來頡頏

所在草木知風霜羣僚從事亦濟蹌如雲翕翕星煌煌
于時曜武勢大張海日照雪明爰斬五牙艨艟具三百
艤岸只待令乃翔諸公在撫不在勦不教而殺謂不祥
緣情究迹有可恤馳文往喻開張開誠布公明而光
援其所溺存其亡小大感泣皆奔降納兵納船恐弗遑
纖颺不動海帖帖遊氛一捲天蒼蒼坑之則肆未免禍
拯之且暇曾無傷天王聖明宰臣正今日詎曰無姚房

土偶禍

鐙鐙鳴鑼彭彭伐鼓復有旂蓋亦有戟斧精力駿奔無
有老豎整整肅肅什什伍伍絳帕昧首花繒綴股中輿
者神像之以土炭乎其冠被以繡組覲者前導跳梁盪
舞亟進如驅適止如阻云神案行于彼災戶惟災之戶
鞠躬偃僂小心來迎翁前後姥家無大小一一拜俯擊
牲化楮薦以醇醕祝神加饗稱我神主惟疾惟患我祐
我祐覲迺執乩運曰神附擊案作聲覲曰神怒必汝不
虔不明告汝渾舍載拜極哀懇苦覲始作書曰有逋負

設通夢寐或聆咒詛牛豕如干等以犬豕鷄鴨及鷄計
當蓓蓃汝承其償其患良愈箕忽輟運少間復舉謂以
汝故往懇嶽府曲為之解幹生死簿覘之以下如狼如
虎從翁叟姥不容有語指日令償令面神許翁姥跼蹐
無以經紀質我青苗鬻我小女典我衣裳翦我機杼求
我親戚貸我隣比是日之屈其輩來聚主張督責救舉
件數數無虧少物必豐美獻事甫成饗彼尊俎酒肉淋
漓撐腸拄肚復有苞苴鬻哉核糈此輩未出患者為鬼

越明之日神復求祀即于東家其作如故哭者在西無
警無悟啗啗之氓昧乎義理生死係命聽稟有數豈是
土偶能奪能與今既無靈不察何俟噍噍羣小附土利
己土豈有知羣小實使此事有類河伯取婦有豹為令
悉投諸水

吳俗火葬

火葬壞吳俗沿愚罔知教體魄輕父母死即畀野燎何
異炎人死亦類儀渠燒古斂以週身致慮防臭暴復棺

益之擲厚土事寔燾區區人子敬鄭重寓私孝燕師慘
掘焚齊人愾敵效子豈忍父母炮烙曾無覺曹侯憫其
弊古訓不可弔闢園號漏澤叢瘞周四塋士庶尚有言
地局寧盡害其言聞之公擊節歎且笑吳愚不聰明耳
目塗泥淖譬諸黔婁衾不足我奚校我為名教惜槌埴
聊盲導虐死苟無親逆生馴亦要勿謂一燭微大惡由
茲造

乙丑六月聞哀詔有感

八十衰黎死境臨來傳尺一痛難禁虞淵愴日江湖淚
把國傷天蟣蝨心負宸周公正思畫解民虞舜未亡琴
白頭病枕茅茨下時夢新君在諒闇

愚翁分與世緣疎國恤驚心泣且吁生長太平惟欠死
老衰餘息尚何如不知伊傳誰調鼎欲夢羲皇我枕書
終日無聊思理髮雪莖些少亦頻梳

述懷

病起試酌

山尊得酒且高歌百歲流光已半過
病眼看書真處少
老懷追事謬時多
髮隨落葉驚西候
門對清江惜逝波
今古英雄同一盡
浮生不飲復如何

病中夜雨起坐

藥盃香炷與溫存
養病功夫要閉門
布被擁寒書作枕
紙窗催曙水臨軒
楓生赭色知霜辱
蕉負爭心共雨喧
物性人情靜觀得
得來還欲費吾言

蚤起

養拙藏衰結靜窩是非如海隔雲蘿
前雪影流頭亂空裏蟲絲礙眼多
病女從人家落魄老妻淹殞歲蹉跎
虛懷昨夜當秋雨惻惻蕭蕭兩奈何

理詩草

佚老餘生願失子末路悲不幸衰颯年數畸
遭禍竒獨存朽無倚如木去旁枝剩此破門戶
力憊歎叵持屑屑衣食計一一費心思
思深氣血耗痛痺引百肢多忘識慮淺耳聵目
無眵一旦一身內有比衆病滋所苦不敢

訴常畏老母知小孫蠢不學次兒誕而癡後事不足觀
百憂無一怡吾性無妄好執善信不疑垂垂白鄉朝
斯還夕斯高高冥冥者何物顧相欺似我未蒙祐及有
苗害惟滾滾人海中黑白何可剗口亦不能問理亦不
能推以死致度外且活是便宜今日盡今日明日豈可
期亦復酌我酒亦復吟我詩我詩無好語稿苴從散遺
兒在曾哀葦今紙著淚縻抱患天地間空言亦奚為

思理衣

七十餘年一老翁
心情鶻突腦冬烘
寒衣無婦無人補
日日關窗怕北風

七十餘年一老翁
衣穿絮破不堪縫
清霜滿地無區畫
掃得蘆花莫禦冬

脫齒行

我齒食所系食以系我生
齒脫寧不憂其系本非輕
近來漸脫二脫者盡之萌
既脫不復留留者亦難撐
留如汎虛槎脫如鑿深坑
編生如相輔豁一傍須崩
生食原

相資今作水火爭妨食生必妨死理端可明完業譬大
族恃子在守成其子無錮心先蕩黃金籬屋售繼失居
田鬻還絕耕溝瘠諒在眼身家同一傾觸類有攸感我
賦脫齒行

病懷二首

衰遲宜靜不宜譁事莫堪懷動歎嗟病遣稗書還藉眼
老便餽粥又妨牙栽花賃地春無主斫竹開門月過家
任是客來難強酒小陪清話一燒茶

朱顏與白髮掩鏡兩茫茫天地大夢宅烟花一戲場算
忙閒固少併夜日還長吾酒吾詩在桑榆弄末光

自述次人韻

日高屋瓦未消霜臥聽秋潮捲石塘九島迷行魚性樂
一鞭威後馬蹄忙獨憐詩是吾家物但有竹為君子鄉
閨外南山今好在時時飛影到清觴

病懷

膈痰漫漫似春潮伏枕旬餘氣未調老日易過如短晷

病懷難遣厭長宵
隔窗忽忽影度鳥鳴瓦
蕭蕭風墮樵
藥物尚功全
斷酒庭柯高掛舊山瓢

病中

白木匡牀草薦柔
坐深無寐獨搔頭
明河轉影天低樹
清夜分更月過樓
病骨瘦生先覺露
老懷虛甚易驚秋
七情莫與微軀妬
生已知浮死識休

舟中有感

世緣一向只昏盲
靜裏觀心始自明
得喪有塵齊後減

是非無種辯時生秋峯長嘯兼天迴月閣高眠徹夢清
老矣此身真長物不知何地著虛名

齒落

七十三年與我存一時迸落豁開門車空已覺乘無物
舌棘猶嫌剩有根顛倒自憐臨水漱含胡人笑漏風言
數來滿口今餘幾軟粥香醪且瓦盆

寫懷一首寄張碧溪

喪亡火盜歲相兼鬢髮髡然瘦骨尖有命窮通天自定

無憑禍福事難占閭閻苟活隨黃槁衾枕媿安且黑甜
海上故人來慰藉不妨一月酒杯拈

閒懷用郭天錫韻

落魄青衫隨草色蕭條白髮遣年華徒勞夢寐費憂國
錯認詩書能起家愚去刻舟忙覓劍饑來索飯誤炊沙
人間亦自有樂地酒遠山巔與水涯

早起偶書

秋早耿不寐起眎天蒼涼鮮霞凝高宇隨日賦采光露

氣浮草木流潤及衣裳人事頗無接懷澄知慮忘

睡起

望七衰翁與嬾便眼昏祇好枕書眠算前去是荒唐日
喜後來為受用年簞糲飯香蓴菜裏子孫計遠摘栽邊
友藤閒遶花蹊看蝶鬧蜂爭各要先

簷間落葉擁高秋謬使人推隱者流背有微暄念天子
手無漫刺瀆諸侯老知絲竹殊堪賴遠為兒孫未免憂
身後算應憂未了且來拂壁畫丹丘

睡起小酌

黃鸝啼夢粉牆東
簾幕深沈日日風
起喚酒盃尋一醉
春愁打破落花中

齒搖

當唇一齒齟將脫
根槎枒棘舌妨嚙
食致憂宣云此動
搖苦浮危軼出奈
參差疑口常沮枚
比眼如礙沙山水
失嘯歌日夕人歎
嗟終知莫附斷且
怪久戀車憐憐滋
流涎數數撫斷槎
欲拔涉援誚希生
聞藥塗聊存徒為

耳卒去何快邪大似狡酷吏作孽開公衙還如敗劣子
驚外莫安家但得噴一嚏迸落從谿舂嚼肉補空窾呼
酒洗豁厓掀髯捫其餘幾輩棲殘鴉作詩尚有告伴老
衍歲華從邁勿以類留二學呂誇湖鄉堪養老鮮美多
魚鰕

田家詠

久矣居畝畝邈如遺世人地靜習雖陋野意還自真怡
怡晨夕間言笑諧四鄰有作相告戒鳥鳴知及春犂鋤

假筋力竭勞供有身身在勞何息顧莫養精神服氣能
代粒希仙渺無津家業信難易樂以充堯民

我畝蕪且瘠我隴磽不平癸歲奮乃功東作覲西成
捐低白頭秉耒日經營稅傭及時畢辛苦勤王程但餘
秫一斛酒熟歡已盈醉引耕田謔不復忌高聲願隨天
風吹吹達九重城劉璋啓此調千載遺令名

無酒

山桃亂開紅欲然我宜賞之無酒錢十常九事意不愜

百又五日春堪憐誰家竹葉賒爛醉滿眼花枝笑醒眠
何消苦苦仰司業便可燒茶隨玉川

老年三病

轉費揩摩轉減光苦無障翳只荒荒
僂眉作字仍虛畫觸鼻看書反差行
葢幅絞綃花懵懂隔重雲
母月微茫從前了了都休說
青白甘輸與阮郎

右眼花

苦無聊賴坐新聲終日騰騰兀兀中
著味笑堪陪座客

劉分癡好作家翁跳江昨夜安秋枕墮葉明朝問朔風
非是是非還自有我無聞聽便應空

右耳聾

風聾蟲攻兩禍端左車淊淊載梅酸舌都無恙先輸敵
唇未云亡莫罪寒送藥親朋徒說効勸餐兒女不知難
老年飲食非輕事又差今年醉牡丹

右齒痛

感興

世路多屈曲拙夫從直行勉欲就此軌未忍枉平生不
如且裹足靜坐羣慮清莫顧蠻與觸了不知紛爭莫辯
夔與蛇多少亦自平持盃洗浮雲太虛極高明

病起

病骨支筇却下堂瘦顏衰鬢入愁鄉黃鸝饒舌花饒笑
一樣春風有別腸

寫懷

荼毒何堪此老身哭兒哭母白頭人海枯兩眼惟乾血

天喪一家俱至親多病所需常乏藥殘生未了尚憂貧
勞勞筋骨仍婚嫁獨對梅花愧世塵

隣火幸不及殃

城門失火夜深時萬幸先生不姓池舊屋尚存還納客
殘書不燼可教兒行藏在我焉無過善惡惟天自有知
今日一盃須爛醉白頭俱是老便宜

闕

撥雨悶

時海盜竊發

久雨我亦厭
涔涔落不公
下田何太濫
東海更羣兇
道路濡際干
戈踴葦中
樓臺虛蜃氣
波浪假鯨風
老者見不忍
高天訴曷通
掌盃雖撥悶
抑鬱尚填胸

秋涼遣病

淦淦新涼兩月秋病多猶自不梳頭
饒奴客燕虛支酒
嬾子書檠假惜油
蟋蟀庭除朝露在
蠨蛸窻戶晚煙收
近時江海愜平盜斗下芒星又可憂

林居病懷

老去不信老自然筋力疎忙緣一嬾
送病髮十朝梳掃
地風還葉開窻月曬書
秋蟲不解靜干聒夜涼初

石田詩選卷五

欽定四庫全書

集部
石田詩選卷六

詳校官監察御史_臣范衷

中書_臣劉源溥覆勘

總校官編修_臣王燕緒

校對官編修_臣閔惇大

謄錄監生_臣閔榮清

欽定四庫全書

石田詩選卷六

明 沈周 撰

忠孝 節義附

唐 琦

琦紹興衛士也高宗南渡海金琶八追至紹興李鄴為守以城降方與琶八並馬行琦從後持一大甕祝曰願天一擊殺兩賊甕中馬

不利被執罵賊不絕口琶八謂曰汝欲何以
死曰我願以布裹灌油焚燒三日示媿降賊
之臣也卒焚之其意恐琶八追及高宗欲以
緩其程也鄉人異而立廟長簷街國朝贈將
軍祀之越人能言其事因賦此

一覽真如博浪鉏事機不偶亦空施降城未分身無用
罵賊猶知舌可為膏火願延三日死海天能信六龍之
長簷街上春秋祀李鄴魂應媿此祠

孝詩六章為顏季栗賦

歸骨

季栗函母骨歸自鳳翔負而陸行懷而江行
卒全首丘之義作歸骨操

荷之跋之函歷阻脩懷之涉之函經橫流生死肉骨兮
天既罔求俾我首丘兮豈天固酬

惟山有狐惟水有龍實能侮骨其割為朋雖朋其割終
不我離微母之靈兒曷能為

迎養

李栗既迎父歸養至視溺清濁以度飲食而慮致疾也作迎養操

父還兒迎叶越彼西疆既達我宇其喜洋洋亦酌我酒其樂融融惟天之德維家之慶叶

惟溲之濁我心惟惕惟溲之湜我心惟懌彼胡然哉孔系于疾爰度爰徵爰修飲食以夕以日我心弗忒

哀殞

李栗以父疾卒哀慟五日夜遂亦不起蓋孝
之過厚者也作哀殞操

嗟嗟違和考實遘痾嗟嗟痾沈盡傷我心鬼神其知兮
祈以身代惟考生兮我亦奚愛

考無臯兮愁印實延顧兮致歿愴印特全茫茫昧昧而
理胡然嗚呼恫瘝兮五內分裂匪欲自傷兮哀至莫節
魂漂漂兮上升氣溘溘兮隨絕

顏氏婦節孝卷

人生苦是從軍行致之死地而復生何況婦人處閨閣
不知關西多少程相從翁姑萬里去性命自擬鴻毛輕
風原霜磧莽何所嗥狼哮虎心魂驚新婦不敢嗟嫠嫠
手扶病姑兼兩嬰中途姑病不復起一身無蒂猶漂萍
歸來函骨尋舊路有眼茫茫渾似盲嗚呼顏家新婦命
薄苦如此只樂節孝傳其名

崔孝婦

孝婦視姑疾轉革心傍徨潛以肉代藥誓為續命湯存

姑若無已剗刀若無傷鬻落痛不入人知云未嘗皇天
助肉神一啖姑下牀子激哭其創掩口使勿揚汝揚義
則過違教理非當肢體具父母克全孝之常此蓋迫不
忍事出倉卒腸復有寔親地既為豪所攘歸璧須大力
婦人本何違拔我金雀釵脫我明珠璫別壤吉可買抱
骨改其藏憤懣終莫釋悵悵致殂亡豹斃尚還文麝死
可留香孝婦雖已矣令名身後光

周節婦孝感

黃氏十九時歸周文璧氏二年文璧喪弱惟一女恃有
姑患痿痺其狀莫比擬有肢如無筋有骨如無髓在牀
如空中有身如蛻委日夜但冥冥僅有息存爾聞聽與
觸動稍及即厥死薦地方擬步通問必附耳艱難食溲
處不敢託諸婢百藥無一效百累叢一已黃氏心煩惱
惛惛不知處東家優婆夷憐憫為黃語汝姑溺苦海汝
知故何以愆業如丘山宿世所積累須皈大勢力南海
有大士解難說真言功德莫思議但要深心持日日要

如是一言一拜叩億又八千數在佛雖有程敬愛無庸
紀功深果報近何患患不起黃氏聞是言煩惱生歡喜
歸室便置像恭敬為拜禮沐浴體投地心觀口娓娓亦
不知其終亦不知其始亦不知其寒亦不知其暑閏日
千八百歷年數得五俄夢見一姥前黃行迤邐心謂是
現化稱名畧不顧極力欲追即步步懸尺只逕入一區
廬闔戶若相拒欸叩發號泣其戶豁然啓菩薩示妙相
金光燦瞻睹頭上珠璣珞晃晃復藍藍蓮目垂慈光宣

言啟玉齒黃氏前諦聽合掌作長跪云汝依吾道悉知
悉見已慈悲為我愿豈無囑付汝循功加精進九日一
扶倚七九扶以行前及我處所覺來汗淋淋其言尚在
耳悟佛為衆生方便指門戶信心愈堅牢額破吻俱腐
臨日試小掖筋骨覺可舉屢試屢無難還能步移跬
予詣像前奠香致情旨其炷從空躍踰梁而直下乃著
於本人正中頂顙裏其聲若驚霆其勢若擊杵身心發
震竦百苦悉皆去如風捲天雲不復剩粗滓如春活枯

草如冰化為水親黨盡來觀讚歎世無此姑謝新婦力
脫我出死簿新婦答何功菩薩威力故此事聞其甥王
綸能覩縷韋虛氣治痿若或有仙技黃氏孝治痿專以
誠為主格物與布氣非誠莫相與孝有致久旱孝有致
水鯉事本出非常未可論常理我特書其孝勅蹊用為
砥至今崑山人大書播邑史

石節婦

呂家有小姑許嫁石家郎石家罹法網合族無留行叶

里豪復求婚趁此事更張慙慙媒氏密為口不知小姑
鐵作腸誓云生死石家婦有脚不踏他人堂皇天后土
閹節義石郎不久仍還鄉流蘓嫋嫋開洞房春風吹入
雙鴛鴦百年伉儷只三月明鏡忽破無完光拔我黃金
釵脫我明珠璫東市買棺斂西山買高岡土中先鑿合
歡穴怨骨待共他年藏此身已死心未亡身上不著新
衣裳有身苦無兒女託養老來依諸弟傍只今含笑入
地下七十八年雙鬢蒼君不見松枯尚有節蘭槁還留

香節婦之名不可泯當與萬世扶綱常

貞節為朱孺人題

松溪之松貞不變松溪之水清不污松貞水清鍾節婦
節婦有家溪上住及笄婉孌女于朱松上女蘿期永附
四七之年分死生女蘿莢莢松忽仆三雛眇矣提抱間
今各蘄然能幹蠱晨春夜織三十年白髮毵毵照荆布
少時望老不易到見苦歷勞安末路譬拔金釵投火中
火盡爛然金若故燒香暗告泉下人白日知心已無負

顏烈婦俞氏義事

顏春吳庠生娶俞氏頗涉獵書史有婦道春
患瘵不起呼囑好事舅姑養子女言切而再
婦曰一言當終身服行何俟再四乃潛握剪
以利鋒刺于左目流血滿地絕而復甦春責
曰何乃如此曰示君信也春遂卒因咏其事
一首

翦鋒刺落玉精神要使亡夫識念真判死不教留好眼

示生無復見他人波翻銀海傷珠顆血迸金支破月輪
表向胥門舊懸處配成忠義激風塵

烈婦吟

湓瀆西潁薛媛卽婦邵吏坐法逮者如虎逮悅薛嫵佻
語肆侮薛醜其語身雉經誓不辱夫以死明黃犀辟塵
塵不生白玉絕玷玷不成嗚呼荒塚久欲平後人立石
題烈名

烈女死篇

周家女子李家婦未嫁夫家但相許正如一樹未開花
分明自有春為主李郎病瘵兩年強說道今年番上牀
聞來人語多不的口又藏羞難問娘只對寒燈淚如霰
為重為輕果誰見此身空負嫁夫名此眼何曾辯郎面
阿娘背語泣堂前忖是郎邊凶信傳烈婦重義輕一死
貞女安心無二天通身示孝衣裳白長練高經繡房
在世鴛鴦不得雙同到黃泉願成匹

烈女生篇

阿娘心悸夜不眠起來顧女如雉懸肉寒氣絕強求艾
引息微微吹碧烟奪鬼為人天假手天亦憐渠能過厚
怕教此義世無知不使其人世無有夫妻未媾本何私
分在名存白日知何如死向白日下千載分明心不欺
今載聊因阿娘活枯木暫回根已撥將心化石立郎塋
表是郎妻刻妾名

葉婦高節詩

節婦鄒氏年二十三甫歸官橋葉氏子芸僅

五十五日芸卒節婦誓死不出房限不與人
見其姑謂曰柰火盜疾病何節婦乃約云云
後疾革囑曰吾寢生處以安死必殯此不可
容弔者入如生之不接見男子以畢我始終
之志言訖而歿享年六十有四余高其行度
越常流遠矣次第其言以著于篇云

葉家夫郎鄒家婦百年同生誓同死五十五日天奪之
一箇孤鸞失其侶腹中顧後無男女手中托生有機杼

短檠長夜不敢哭白日深沉閉房戶老姑謂婦歲月長
新婦告姑聽我語我身聊奉姑同居我心已與夫同土
青天雖高所不欺白髮固遠要自取憂勤患難以靜制
禮義廉耻在剛主火來脇房我不動委身一焚火莫苦
盜來敲門我不驚先身一刎盜何侮病來容藥不見豎
有臂可斫診不許事雖未及慮早及口既能言身有處
世當可重儼金玉家不可少比稷泰臨終一著猶可竦
笑謂家中諸嫗姆老身幸享六十餘數盡年窮理宜去

紛紛身後惜事亂從此治時先囑汝房前指限喻如山
自我入來無出武房中處久於我殯魂識依依得其所
生前忌接男子面死魄毋令弔人覩人間嫠寡堪作別
始末高明越今古朝廷未聞鄉且頌完德更宜加藻斧
何人有力達太史何人有力達公府嗚呼節婦今冥冥
其身可腐名弗腐

贈韓珍

恩以生骨肉義以生撫育韓珍本異姓恩與義兩足心

肝蓄義血甫有數十斛義氣溢皮毛馨馥及衣服主父
病京邸危命一線屬千里獨奮徃併日走匍匐藥物無
能為事亟割股肉股亦割義刃無懾亦無愾雖然不救
死揆意義亦篤君臣亦義合徃徃逆亂伏珍乎可珍哉
搖毫吾特錄

咏費彥傑還釵事

淮安新城下交易利所在徃來十萬人財貨溢閭閻道
上或有遺一錢尚爾愛老叟費彥傑早行足有礙俯拾

黃金釵耀目口發喟乃詰旁居人經此何淑艾衆云未始見
見祇有輿載恐是惟中脫去此尚未邁費追逾阡陌氣喘
力良憊止輿問何失曾莫有所忒輿女驚其言撫髻乃覺讀
牽帷出粉黛便即就地拜還釵叟疾走更莫延少話女却
叩姓里答云不足芥無姓住亦遠欲知將奚待我亦弗汝
詢彼此付曖昧此事常有聞但慮斯言覺偶與叟相接詢
之乃至再叟笑云雖有宜還無可怪嗚呼古人事喜見行今
輩揆今實為奇蜀日犬乃吠在叟似非難在衆則難逮義

利寓人情要之得其裁吾詩為史發庶亦存俗戒

蜀國宋承奉好義歌

君不見簪折尚有憾缶破還失聲可棄復何惜奈有不
忍情蜀之內相宋公者儒服聊借貂璫紫翻編展卷日
不輟談仁說義口似天河傾前年構江橋長虹跨彩成
雙清今年結淨居樂哉斯丘手自營費金萬餘極宏麗
空墳一箇身長生國初宋學士華國文之精蠶叢生流
死且寓山水嚙塚見者驚今之內相古王巨感此惻怛

思遷更撤我闕居為彼佳城萬金之重忍一擲折簪破
缶無其輕割愛以酬義千人萬人無此能割財以徇義
千里萬里流其名來者有濟行人讚歎橋上行逝者有
惠枯骨負荷於冥冥何公慷慨乃如此其德好藉詩書
成可笑士良以書禁人讀欲使耳目塗聰明嗚呼以公
視仇仇乃詐以仇視公公乃誠

義商行

商程無山川逐利是所征商車無歲月徇義豈其情程

君惆悵懷久矣客遼城前年聘少房
鎰金酬娉婷娉婷來歸際掩面淚縱橫
謂翁坐逮賊鬻夫未能盈失身馴及妾
包羞履君庭彥寬未畢說殺遣誠亟行
人妻我可奪人急我可棄酬金弗汝責
毀券迹亦平既以贖伉儷復以贖答榜
父子與夫婦載造遂歡迎義利在天地
有若水火爭達人識所嚮遐邇騰芳聲
我聞詰彥寬輾爾無答謦徐云勿多揚
我初不為名我即低頭拜古誼重光榮
讚言欲勸薄拙斐惟勉成

常熟張修謨孫女許人為妾楊大尹明父改妻

先賢言氏之子因賦

芳蘭沾糞壤貞女議少房為計墮媒舌父母惑如簧女
子何所知衷心不分明令尹廉非偶喟為先德傷割俸
資返聘乃幣乃筐篚改求大賢後言氏得秀郎貞女與
秀郎既婚復有將此事若天幹鬼神與之襄令尹通神
明義氣扶綱常摘珠出泥塗炯然開夜光拭壁從埃塽
煥爾昭天章富鄭自范擇言子思激昂結草報治命翰

譔當不忘我特歌尹德詞短意則長

烈婦殺虎圖

誰謂繞指柔能化百鍊鋼誰謂婦女柔殺虎如割羊有
女如鼠恐其虎況能殺虎非不祥脫夫之命豈例此當
熊之勇同肝腸尋常鍼線倦紫鳳卒與虎力爭其強虎
時顧得不顧失婦心顧存不顧亡手中有刀愛作刀以
義淬之無敢當天寒月黑星有光虎血塗地葭蒼蒼人
生有行無棗陽

楊氏義塾

老重諸孫教還推與衆同就於家有塾顧自我求蒙買
讀書金白供炊廩粟紅四方皆競利此地有文翁

分得義莊送李中舍貞伯還朝

君不見范公嗜義如飲食范公庇族如羽翼親疎百口
百不憂養生送死皆公力公存公亡猶一日有田供需
惠無極伐石紀事莊上頭大書特書高十尺李君車馬
有行色下馬讀碑三歎息若見甘棠思召伯若對澧流

思禹蹟李君亦豈尋常人身小才大氣正直博學強記
無與敵平步便當超九棘十年小心職文墨階次悠悠
鬢將白故園已築梅花莊此意含仁我先識嗚呼范公
之後多間田願君買接東西陌

鎮南世節行為黔國公賦

黔公坐鎮封內清黔公卧治封外平碧雞金馬作門戟
復有滇池供洗兵黃牛平把寶刀換春山來勸諸夷耕
諸夷愛戴非一日子孫孫子知生成雕題花脚最難服

今日推公無孔明憶昔先公遇高帝鼾睡龍懷天不驚
印如金斗酬百伐帶誓黃河申載盟桓桓祖武看公繩
天南別隱一長城金湯雖固尚在法恩信相孚何待征
古稱僕射如弟兄軍中笑歌髀肉生國公自進瑪瑙觥
醉後還賡出塞行

費元詩

義事久不見將謂民風漓有此費元者秦人何可欺嗟
嗟逆旅鄰平昔昧所知瘦死憐頃暫給饘活其饑傍窺

妄譏議將利室中姿鄰後願奴報夫婦自同來元曰非
奴利苟利非我為掉頭畧不顧天地知吾私至此嫌猜
盡君子未嘗移所薄既云厚厚者宜過之兄氏沒永平
計達肝腸摧哀痛出天性殞絕豈自期或謂不可訓若
撻閱牆兒斯人今已矣其骨當為芝其魄當為雲祥瑞
昭明時況是有賢嗣天報信不差尚有千載後名從青
竹垂

二姬

晚色寒香二姬名也吾友張芳洲無子未聘
之者方洲過世服除其長女劉夫人俾諸妾
尚絲麻結心獨畧二姬曰汝少年歲月悠長
當有別處二姬曰蒙先主公取憐日久雖死
不足報况有他意哉遂焚香告天大慟二人
互相落髮以表其志因賦此以旌之

色香寒晚總非宜豈是蟠桃結子時
種樹園林春寂寂惜花窻戶雨絲絲
鬢雲截誓生同落心石存恩死不移

兩結青青百年信九京當與主人知

荊花春意為彭昉寅之賦

我寫彭家荊不寫田家樹彭家兄弟無異言不似田家
初有異兄弟原從一氣生荊亦同根復同柢花不亂開
則聚枝不亂大小附葉不亂上下蔽風吹枝葉動月出
形影具有兄弟應求之義次第之序人謂彭家有此兄
弟和我謂非此而能致老夫見其祖子孫和順孝友迨
三世無乃氣體之孚以和召和曾不戾彭家此樹未必

有我今寫此尚與存勸勵嘗見他家真有荆樹下閱牆
兼紵臂饒他漫有好荆樹不如好兄弟有好兄弟荆亦
貴無好兄弟賤與凡木類我寫不寫樹寫其兄弟心之
懿兄弟和在心音聲容色愉而意不和名不祥家不利
我雖為君寫萬樹不若自栽一樹方寸地

閒適

睡起自遣

書枕悠悠自小康何須斷送腳塵忙屏心雲氣山開畫

樹裏簷聲雨滿堂
名利可憐雞有肋
神仙祇累鼠拖腸
時時具酒招鄰曲
閒與桑麻較短長

覺老

脫膈生痰謝酒觴
菜羹麥飯且家常
山追舊眺今成懶
事喜新聞背已忘
春水試竿漁檻淨
午風丸藥鳥窻涼
祇須如此成消遣
種種塵緣與老妨

窻下獨坐

漸覺年捱七十傍
聰明視舊已茫茫
有生但恐違溫飽

凡事無能與短長食力田園聊任拙離羣城郭少知忙
新糊窻紙添虛白尚把殘書趁日光

病起

筋力遲遲百嬾成關門只好謝逢迎老空求舊無同輩
拙不宜時讓後生久坐衣裳知晚露獨眠衾枕厭秋更
祇餘曝背兼捫虱黃草簷頭覺稱情

試筆

老大為生未有涯浮雲流水淡於懷小垂舞袖人嫌拙

寡出言辭我自佳月下古編開韭几雨中高竹映茅齋
無心苦算閒時日任爾新萸綠滿堦

睡起

欲晴不晴雲閣雨欲落未落日掛山道人睡起思如水
閒倚長松數鶴還

晚步

西林聊獨步樹樹已棲鴉童笈歸村校漁船聚酒家玉
痕雲映月紅纈水明霞此景偏留戀衰年類日斜

早興

清霜被羣葉青黃紛委地病肌粟朝寒烘背俟陽氣深
坐聊展卷眊矐怯細字歲月遶吾老不謂易以至盛衰
理自然微吟不成嘅

晚坐

春殘尚絮袍林屋氣蕭騷白日若不夜人生亦太勞泥
花方失勢雨筍漫爭高小酌仍觀物新醅愜老饕

擬一日復一日

一日復一日一朝復一朝青春不用推白髮不待招漸
見強者大還催老輩凋借問學仙侶此關果誰超神仙
本冥冥其言亦寥寥獨有姬孔業天地同遙遙

晏起

水漫湖田雨漫邨家貧只好不開門詩書衣食外無德
天地君親中是恩馬失未須論得失楚存何可卜亡存
百千世故都休問且把心耕教子孫

晚出過隣家小酌

兩旬方一出門外事紛拏魚促春波淺鳥爭林日斜老
夫傾竹葉稚子捉楊花小坐聊乘興猶堪感物華

紀夢

隱居遠住海邊州山水清標接夢遊酒醉又移花下席
書多別起竹間樓兒郎習字陟釐紙童子供茶秘色甌
起擁黃紬尋幻境一痕斜月小窻秋

慙慙

慙慙無復老人懷春日烘門晏始開遊行太平初試杖

安排樂事數拈盃世情花黨富家發公道燕均貧戶來
識字不多強不識小篇聊與物追陪

貧富吟

貧富限世分高下莫均一富者詫潤屋餘潤及銘筆貧
非止赤身裸死至無堅苟云可操致智士豈無術冥然
觀無物二者何得失

閒居

殘書滿屋迹堪埋俯仰寧求與世諧貧賤自安愚者分

毀譽何撓老年懷小篇鉛槧時時課糲飯蕭美日日齋
外慕素空塵夢絕庭前似厭有高槐

慶壽 生辰附

玉洞仙桃壽傳宮磨曰川

傳說本是天上星攝行相事奉青駕老成端諒帝所選
韋賢李勣德不亞譬為舟楫濟川用譬為繩墨梓乃架
表儀鶴苑統仙班祇講麟經曠清假左氏文章費紙傳
溫公肖像令人畫洞天開府住有家度索蟠桃覓無價

記裁日月降甫中
看到雲霞接嵩華
三千結實歲何長
萬核裹泥生不罷
其人如玉壽如桃
八百老彭何足詫

趙惟章壽詩

葛天之世此心藏
萬事熙熙不著忙
鄉認當時非姓鄭
人疑叔度誤呼黃
詩供賓客三千竹
衣蔭兒孫八百桑
宅相愛談吾耳熟
固知賢者壽能長

盧以和生同歲月日時

與君一歲月日時
日亦相因何止同
丁卯休論雌甲辰
偶

然逢此數勉矣各為人落魄乾坤內吾生豈患貧

六旬自咏

自是田間快活民太平生長六經旬不憂天下無今日
但願朝廷用好人有萬卷書貧富貴仗三盃酒老精神
山花笑我頭俱白頭白簪花也當春

壽表兄金懷用七十

筋骸可與少年爭七十長鬚白未成鄉裏燕毛多讓席
族中雁行盡呼兄魚蝦細水烟蒲漲鳥雀深叢雪竹浜

樂此閒居儘資壽燒丹辟穀見誰生

六十一自壽

重逢丁未開新甲過六十年增一年壽是倘來那必得

人於末節要求全占鳩挾婦傷今日亡室同月日生羨鶴添孫

欠此緣時未得孫萬事莫論吾母健進將春酒北堂前

生辰

今朝六十八歷歲知既夥青春不還人七十近在左流
光迅晝夜忽忽迸石火我與石火爭寄活真螟蜩但願

無疾疾詩骨瘦亦可浮雲載富貴過眼顧不朶先人有
薄田數口頗纏裹關門事清咏天地自容我

生朝自遣

門前客到鶴先鳴灑掃茅堂作送迎座舉龍鍾先有我
鄉尋儕輩漸無兄明年七十將來壽今日三盃見在生
一幅布巾藤作杖倩誰林下畫閒行

寫菊壽王學士濟之尊翁八十

我寫東籬第一枝長生豈止紙為期年年上壽百年計

日日看花九日時還喜帶金同晚色不妨鬚玉照寒姿
莫釐亦是登高處未必齊山許有詩

生朝

茲辰始度世眇然畱我形良荷生育德允含天地靈寓
品幸稱男耘耔充園丁衣裳賁其裸歲月假以齡駸駸
及朽腐草木自林垆隙光感多閱傾水莫返瓶承流且
云邁數止我自寧

生日小酌

今晨感我生襁褓迨衰老歲月倏徃來七十何草草譬
初同此日天下生不少善惡與昏智貴賤及壽夭各各
不可齊鵬鷃皆自好但恥老醜人多為後生藐我母自
愛我論事且訖了兒女自愛我勸我飯加飽朋友自愛
我把酒頌且禱我生已萬幸際茲世有道拙廢固無用
農圃亦可保盃酌雖寡嗜些少慰懷抱偃息間行游隨
意弄花鳥樂哉天地間偷生亦為巧

分得清白遺後壽曹時中憲副

東家歸人買田地西家歸人置歌妓先生亦是歸來人
完名怕著黃金累教兒但守舊茅堂鬼瞰不能低可住
先生高壽却瞰人東田不存西妓去

七十喜言五首

自知蒲柳望秋零意外驚延七十星膝下還為小頑子
籍中已是空閒丁先人蠹卷箱藤白老母魚羹釣竹青
儘把餘生享天福亦無慙媿到山靈

萬萬人中數我零為農亦是一微星衣裳無補吾明主

天地徒存此老丁
濶水游魚尾不赤
絕雲高鳥影俱青
笑看拜極癡兒女
已到希年尚乞靈

七十迴來秋葉零
後憐歷歲已晨星
不才儘自慚諸已
識字聊堪破一丁
心事浩隨雲共白
鬢毛難學草回青
湖田繞舍粗饘粥
雞骨豐凶屢托靈

眼識茫茫齒髮零
種田還欲候穰星
百年云倘行猶未
七十為稀幸已丁
待月露生秋袷紫
仰天風卸暑巾青
時修靜觀心齋裏
應物虛明自覺靈

七十稀年又九零敢憑虛妄更推星身軀薄劣無壬甲
詩草繁蕪合丙丁饌品久空魚白白葷拌尚詫韭青青
因多歷世多知事非為谿翁性有靈

生辰

野叟堂堂七十一乾坤坐閱老頑身美人座上笑白髮
白髮鏡中催美人且就月庚尋活子莫憑年甲算生辰
丹丘好在吾家裏滿眼生涯滿抱春

庚申十一月二十一日生朝作

七十四年剛送過今年添作五年來從前饒算沒一馬
向後猜闢知幾枚菜子筋骸強可舞吳兒心性老仍呆
人家有地皆桑苧我獨貪香却種梅

壽萱為邵國賢賦

誰家無萱草誰家無老母堂前無孝子萱草亦空有邵
家碧玉根孝感生不苟開花作婉容順葉承左右愁非
備養具不足充體口邵子所以種涉孝豈敢後聊寓盆
缶春志自超盆缶干祿以代養早已登州守官大功名

大封榮日加厚腰帶映金葩
首翟照春酒如何母不樂
樂則自宜壽人生養至此孝果在萱否

壽趙與哲七十

隱德堪尊齒亦尊一家風物自桃源
鞠躬禮度強筋力隨口詩書善話言
郡裏歌鍾大賓席人間玉雪舊王孫
七旬黑髮期黃髮兀兀靈光看獨存

畫松壽大司馬三原王公

尚書府中松十抱直氣貞心不知老
關中土厚根柢壯

十年間生地之寶上叅雲漢不屈身世間草木斯為表
用之擎天天久恃用之柱國國永保伐柯擊姦擬顧笏
摘葉指佞比堯草朝廷何可一日無百不為多一非少
凌霜傲雪古色存蒼蒼直與秋天杳孔明廟前有老栢
此物亦自因人好大觀直謂古今同時固難同貴同道
金花玉苓仙所食只在長生不在飽須公采啖三萬斛
四海蒼生期壽考

壽張黃門靜之

千篇詩是紀年籌小算方經六十秋
舊接夔龍侍香案
新移雞犬別方洲
大觀滄海難為水
老望瑤京更起樓
壽祝如岡錯璋字寄君一笑海東頭

雙壽為錢時用賦

嚴算方周甲慈壽稍一先
歲年成上下天地與因緣
春酒百花下南山雙闥前
兒郎新舉子父母老神仙

題松壽崔望宗

高松環翠堂前物材比梗楠
壽比椿雲蓋今看樹成日

雪頭還在手栽人新芭壁玉收蒼子靈柢蒸霞驗伏神
我祝長生寫生去墨花吹雨硯池春

生日漫言

幼時慕八十妄念笑荒唐八十思幼時過事驚渺茫事
過三萬日人如傀儡忙忙忙到衰老傀儡是末場謬以
百年算畸日苦不長雖有六千日長短未可量使長莫
如前使短亦不妨固非罹夭闕白髮映黃腸生順與沒
寧大觀理之常今日喜飲酒樂極發悲傷盜跖不在壽

顏淵千載光壽亦何足重所耻無流芳耻貧無潤身不
耻食糟糠耻賤無克家詩書在猶亡腐草舉末焰螺田
懷餘香含靈參天地息存還自強

壽華光祿七十

壽躋七十古云希七十生男更曰奇天自安排還有數
仁能昭報豈無時蟠桃仙種遲宜子椿樹靈根老又枝
八袞山翁把春酒當筵兼咏弄璋詩

紫芝白石壽韓戶書

地貞知石賦天瑞信芝生大補媧五色駢開漢九莖鮮
霞擁華蓋龐氣結元精磨軋存金礪晶和象紫瓊商顏
歌塋爛砥柱看崢嶸敢比魏公德還期壽作朋

壽張碧漢六十

先生雪鬚面如玉公輔隱然觀器局丈夫出處自有數
功名未在三千牘奈何駿骨老兀碑相者茫茫惟舉肉
先生掀髯發大笑誓弗回頭顧場屋江湖滿地氣豪傑
浮雲萬里空雙目本色風流賀季真著家詞賦張平叔

吳山越水行有窩爛醉何妨倚絲竹只今仕路成市道
黃金不多不推轂先生此夢已脫枕蹇驢破帽曾不辱
有時讀書至無逸何乃咄咄憂不足此心自許天地知
萬事奚憑鬼神卜今年換甲迨六十教我畫松須屈曲
靈根久世非脆物抑鬱風雲見畸獨我知道造化有深意
信與之壽吝之祿一千斯年抱貞固犧尊青黃彼菑木

會晤

雨夜宿吳匏菴宅

雨中客舍苦局促故人招我有尺牘書云竹居可閒坐
烹茶剪韭亦不俗得書徑往興亦豪何慮衝泥污雙足
開門山林在城市濕綠如雲亞羣竹主人罄折故意深
道慰契濶須信宿榻上為我設衾枕堂中為我羅酒肉
我時肺病已絕飲強舉一觴連五六長談細辨困僕夫
燈影簷花亂書屋羨君有弟雅誼同山水光明信珠玉
故事方思衛八家還咏逍遙堂後木人生良會豈易易
他日如今又難卜繆圖菲語何足記雪泥聊耳知鴻鵠

天全徐先生夜過

成化七年暑夜天全徐先生過雙娥僧寓小
酌踏月歌邢惇夫黃知命夜歸詩因賦此索
先生畱題

法雲夜歸黃仲達騎驢高歌仰明月天風獵獵吹白袍
履常殿後走不迭撰杖負囊無乃媒過市小兒笑口咽
何物老子作怪遊俗夫豈爾須仙列李圖邢詩遂大傳
邈五百年無四傑先生尋我興亦豪入更來敲僧戶閉

栖烏翻樹露滿葉長彗埽斗芒不折先生呼酒要排熱
乃云秉燭古有說三花朗咏掛巾篇故事不妨吾載設
高致風流自斗山一遊一嬉知不屑先生於此如有言
當與雙峯共磨滅

無錫沈宗貴存耕翁之仲子自弱冠侍翁至余
家余年十三見先父以詩畫贈存耕經四十
九年尚存宗貴所觀感而賦此

少別老逢情更真中經四十九年春青山昨日先君迹

白髮而今我輩人世數交遊詩作證話生感慨酒淹巡
旁觀莫怪多畱戀求舊原非一面新

與客夜坐

兩年方始一相逢偶集飛鴻雪後踪清話更添新繾綣
老身全比舊龍鍾弱雲弄月微分影細草關春暗轉容
不復事盃成兀對薰爐頻喚小奚供

喜程元道見過

客子到門西日沈情緣一見一迴深逼除歲月怱怱語

遠市盤飧草草心積竹叢寒魚合澤墮樵風急鳥爭林
白頭與世殊疎濶特地因君理舊琴

與客夜酌次韻

高臺添燭漏初長一握歡聲哄夜堂入座明河斜轉影
隔雲殘月淡容光如詩不就君當罰願酒無多我恐狂
非但同年更同道白頭生長尚同鄉

史明古見訪

春來開門見新燕故人春來亦相見燕子不肯嫌貧家

破屋還勞故人睠
燒燈屋下照白鬚
高談雄辨如壯夫
且言老境知己少
感慨滿懷人事殊
常當有酒開口笑
君來我往亦須要
願從君言不敢違
肯作西飛伯勞東
飛燕

燕王汝和水月軒

青子綠陰還可喜
酒盃無地不相宜
夕陽翻席到人面
遠水搖山隔目皮
今日直須終一日
暫時何卜有他時
世間樂事尋常得
但惜人生多別離

勸性甫飲用韻

喜君飲酒量不慳百壺五斗曾無艱
鬢毛苦短日月老人生自忙天地閒
紅花的皜雨脚後白鷗浩蕩江光閒
明朝又擬常熟去典盡春衫方始還

會施知州煥伯

河洛頻年勞宦迹歸雲倦鳥是休時
行藏有道無違易康濟存心更事醫
青草糴鋤問農圃白頭盃酒話親知
何妨日日相追逐百歲人生會有期

謁謙齋少師

潭潭府第倚山城故舊何須俟
价行閭吏未知窮措大
相公自識老門生
飡枲夾供叢談久
鈴閣添香燕坐清
頭白歸來濟時了
義田還復課兒耕

李司成至

詩書禮樂賢關長
貧賤農桑老境人
久荷清篇留卷軸
又驚高誼動車輪
梅花歡喜當簷笑
柳色殷勤滿眼春
雞黍不嫌隨草具
斯文一味覺情真

喜蘇文輝見過

杪歲風日寒臨門訝高駕晦迹久不出詣舍此云乍稜
層見詩骨孤瘦立秋華筋力駕年紀手策不少借升堂
載拜健歡覲饒言話性真具淳朴慮靜得閒暇安然丘
壑姿可使觀者化盃酒亦畧飲深坐且清夜人生屬長
離大半付悲詫雖獲少聚首未足為慰藉我生尚碌碌
世諦未由謝何能傳隱訣低頭事耕稼

花朝雨中與王汝和小聚

與君將短髮慚媿柳條春白日急換歲黃金忙殺人漸
憐知己少獨覺老懷真把酒不在醉看花聊此晨

喜張碧溪至

重子杖藜非厭貧秋林紅葉頗如春交游未必在盃酒
正是老年無故人

喜許國用探疾至

藥爐烟暝隔生痰怪是新春百不堪樂事惜從多病誤
老懷喜與舊人談臨牀細酌更延五繫岸孤舟日轉三

雪裏梅花殊未發此情亦似為君含

國用持前作至復用韻

坐深頻滌唾壺痰老態人前覺不堪靜觀欲從僧去學
新聞還待客來談雲涼桐肆高尋墨雨沃蕉苗長四三
今夕喜君申舊好小窻燈影酒中含

碧溪見和亦答一首

髯翁能飲老無痰風度詞華種種堪青紫盡堆儕輩拾
桑麻聊就野農談濁醪累舉觴成十拙韻連篇和及三

此卷一時千載事後人重展笑應含

過華光祿適出乃返後遇途半叙話夜深余以
丹毒思歸遂解纜而東留此以謝失告之過
風雨登臺值兩山相逢復喜半途間得追笑語非虛約
更攬髭髯訝老顏水宿極憐舟並住宵征無那病思還
圖書有日酬清賞莫謂浮生無一閒

題山家壁

舊過山家今莫記屋頭高蔭發新楠三年眼見樹如此

雙鬢情知老不堪
歎有盃盤及奴輩
話因門戶恤丁男
病餘未似前能酒
亦為殷勤入半酣

次匏菴雨中留宿

野水浮雲蕩夕光
仙舟兩宿古溪傍
清篇感舊頻翻韻
濁酒謀隣載過牆
燭跋不知春夜久
雨聲如為故人長
衛家剪韭今傳美
他日寧無有竹莊

走筆留客

谿上不礙路谿水如招人
好友南海來談笑氣若春
我

具一尊酒宿昔可以論况逢中秋月成我兩嘉賓雖有
東轅車我欲方其輪願因長相留離別勿復言

十一月十七日盛仲規迺子乾旋見過

一冬不作寒陽氣殊泮渙昨夜病枕中朔風驚耳觀瑟
縮朝怕起高日照海岸枯林尚著著喧噪鴉鵲亂門前
報剥啄有客立凍鸛且云宵征苦逆楫宿途半扶僊出
慰謝鬱抱從笑散復云鈍舟者家君庸自訕此行亦小
鈍父子當併案君父有不鈍文筆捷飛翰子宜捷其捷

未許仍鈍貫捷鈍姑置之醺酒促燒炭

與客夜話

老年多病只關門始為尋醫偶出村春過寂憐花致事
雨來忙見草承恩故人落落星催曉舊話淹淹月報昏
酒盞莫教辭潑灩客舟猶喜一壺存

夜酌與浦三正姚一丞沈二璞沈三觀大聯句

親朋坐多違偶合歡拍塞正詩懲夙盟寒夜感衆誼息

丞修辭擬藻擣操毫學著周求應尚同聲擇知貴合

德璞遘簡戒羞承記燭期短刻觀大錙銖罔乞鄰纖芥
必出臆正聯成準纏糾句拆肖瓜副丞例在賞速成罰
難恕遲得周口吐畧腐陳意命隨曲直璞或逞覺軒軒
或屈耻默默觀大爭奇驗所豪角勝見乃力正不絕亘
韓師若畫創益織丞何高不欲躋無古弗祈即周從容
三達尊娟媚兩絕色璞淡誇揖讓潛贍要排揆軾觀大
蓬閭萬水縣靖函一九敕正穿鑿惜混沌愴恍覲鬼薨
丞浩蕩掀鵬天翼屨壓鼇極周幽脩盼谿梅塞澁歷蹊

棘璞窮拙無餘思瑣拾有遺憶觀大點指互咄吁支願
相臬兀正設醴初假鈎流盃反因勒丞大都飲文字政
不在酒食周尚雅髡何暇辭淫完太嗇璞留連鵲番枝
展轉雞振翼觀大鑿慢鑪燭消執困研漿踏正衣絮凍
逼薄漏水風咽瀟丞汚筵墮衰燼躡地響殘核周啟戶
霜月正掛樹河漢仄璞會晤亦尋常風流惟此特觀大
留蘇安道

東湖雨晴春水生美人載酒湖中行茅堂剪我三夜燭

論文說劍言縱橫桃花楊柳渥春雨今朝撥棹東湖去
呼兒釀酒緩歸心春亦未歸君且住

支硎山麓逢楊君謙

林谿相值夕陽邊迹似無官意有仙高笠冒雲宜我畫
小詞磨石信僧鐫山逢佳處肩隨轎眼落閒時袖出編
隨後擔夫亦殊俗花筐酒榼兩頭縣

十二月四日入郭小舟逼坐五客徐舜樂出吳
太史所和東坡先生清虛堂詩一韻三篇末

章有及余者時天作小雪亦即興奉同一首
長河水落浮淺沙舟小客衆蜂喧衙江天翳眼雲作色
薄有雪意飄微花老夫抱病久不出歲莫瑟縮難辭家
荒郊寒風吹濕葦落雁接翅隨翻鴉前林枯條頗封白
的歷還疑梅著葩蓬窻欲賞苦乏酒覓火未便仍無茶
舟人却信我固吝婦翁枉事倫何極詩喉無奈渴少潤
祇累短髮空搔爬清虛高韻不可借聊且試筆開煩嗟
匏翁三篇況在側宛宛玉氣生高霞

留金仲和

脫葉莫能綴折竹不能連流光背人去一去亦復然釀
酒豈無米種米豈無田豈有八十母兒可離膝前膝前
亦頃暫老者不少年襄陽雖云樂扶母難登船襄陽銅
鞮歌白日花滿煙思家總多夢母不在枕邊勸君母子
勿相失看取牀頭子母錢

與史西村相值途次遂同載

寒雲連雁古長洲萍梗徵踪此水頭幸爾相逢風雨裏

他人無限往來舟遠遊不盡江湖話多病還驚霜露秋
一見一迴成一笑老懷離思總悠悠

穀旦喜朱性甫至

城裏高官儘有衙迂舟却到野人家偶談山水悲筋力
因怪兒童忽歲華白髮知春不如草青燈隨眼漫生花
遣懷慰客非無酒罍耻還當一載賒

載會浦東白

八年初得載經過喜滿雲蘿入笑歌老盡鬚顏畧相似

記來年歲久應訛西風部屋蕭蕭葉落日蘋江渺渺波
雖是病懷須強酒人生良會苦無多

與狄天章夜話

短棘長荆古道荒時風霎雨世情涼酒盃對面常肝膽
緩急從人卒在亡腐鼠與他饑醜得癡蟬招彼黠徒忙
約君且卧茆簷下九仞高雲看鳳凰

雨中會子暘李太常仍同赴謝氏席

萍蓬吳越水偶耳合清緣發興欺沾雨因逢數曠年木

蘭同小泛櫻筍轉高筵去倦不告別歸程殊快然

會吳獻臣兵備兼謝惠詩

野老本孤陋於公荷特憐出門今偶耳傾蓋昨同然風
雨酬一話詩書當十年永懷非日月高誼薄雲天俯仰
少知已遭逢誠勝緣枉推慚極口汎愛悚高篇貌瘠道
腴內官廉德儉先鵬圖協公薦馬走願私鞭文武無愆
用崇卑各適權東吳卿月轉南徼使星躔道路瞻風節
山川照雪鋌府尊嚴武位幕集杜陵賢懷遠人何邇均

仁俗不偏明良愀盛遇衰颯舞林泉

黃克明使雲南還夜話

軺車萬里使星孤故國重逢已白鬚濁酒臨燈共風雨
新詩滿眼見江湖數車薏苡如珠否長柄壺盧有子無
劉道真問陸士衡曰卿自東吳來有長柄壺盧帶種來否問俗論心言不盡鐘聲半
夜喚啼烏

侍家父世父與劉完菴西菴文會

野寺清尊對鶴羣我來行酒聽論文門前歇馬依青柳

池上開軒見白雲自喜獻之同袂事還慚阿買張吾軍
醉扶老父還家去桑柘秋陰日未曛

重逢謝將軍

十年歸鬢雪紛紛桑影榆陰日半曛帥府別開新院落
監門還識舊將軍行逢戰蟻臨階看坐愛歌鶯隔樹聞
耻向太平憔悴盡英雄無地覓高勛

石田詩選卷六